

四庫全書

集部

欽定四庫全書

客亭類稿卷十二

宋 楊冠卿 撰

古律編二

古體詩

天孫徠

原註以下四
首上趙丞相

珠宮貝闕天女孫
膠轕璇璣緯星辰
徠遊河漢儼于神
神儲崧嶽生甫申
胷中文字覩天巧
黼黻帝躬臨下民

平柳蠻

孽狐魅鬼嘯篁竹紅綃帕首郴江曲萬牛鬱炙甕行酒
黨伍穰穰萃林藪牙璋夜半起兵符雲旗驛騎爭馳驅
搜原別藪殲渠魁巢顛子覆苔葦枯虎臣獻凱錫珪組
玉帛金錢充棟宇追蹤漢相不言功山河帶礪傳無窮

祀明堂

總章備物嚴秋饗尊祖合祠規汶上宰臣恭肅相明禋
精意潛交通盼蠶殊庭朝薦燎煙升陰雲駁落天日明
百神駿奔風馬下休嘉協應年穀成

除關征

翠華憶昨臨吳津
駕言直欲蘇遠民
三尺土階茅不剪
舜循堯道慈而儉
姬公制國有常經
什一更除關市征
男畊女織餘布粟
却笑二吾猶不足

天孫嗟

天孫黼黻文膠轕
璇璣外大巧本無
為女工卑組繪胡
為小兒女纓弁雜
環佩庭羅簪餌香
設祠祈且拜臨池
五綵絲更結相連
愛

僊遊

迢迢秋夜長娟娟霜月明
隱几觀萬變頽仰周八紘
人間厭謫墮翳鳳騎長鯨
寥天排雲征高步撫流星
羣僊羅道周有若相逢迎
旌羽絢虹蜺環珮鏘葱珩
問我來何遲攜手上玉京
陞級扣靈瑣班聯遙紫庭
綠章奏封事清問殊哀矜
飲之以雲腴錫之以瓊英
下拜亟登受倏然雲霧興
杳不知其所變化無留形
俄頃雙青鸞銜牋報歸程
望舒肅前驅徒御了不驚
歸時夜未央仰視

河漢橫天風西南來隱隱笙竽聲鈞天認帝所昨夢愴
難成

從李使君假記室吏

阿嬭嘔心兒佩囊有奚奴杜陵短褐翁抄詩聽小胥我
生味風雅古人思與俱家無儋石儲誰其供指呼主翁
居專城鴈鶩紛庭除記史飽餘閑願言假一夫授以烏
絲欄副之玉蟾蜍晴窓掃桐葉細字蠅頭書

倚梧歎

白首寄人間萍泛無休日撐腸五千卷豈乏濟時術富貴不可期惆悵難再述日暮倚庭梧寒風聽蕭瑟

懷古

干將補敝履鉛刀割金牛千金市駿骨鼓車役驛騶薛燭已云遠伯樂不可求此理難致詰吾其賦歸休

冬十月百卉盡芳

淳熙戊戌冬十月恰似東風三月時冰霜不變冱寒色溪壑次第回春姿花情柳意已無耐紅英粉艷爭紛披

道傍牛喘不復問欲了公事真癡兒

麻姑山東涉千堆壠至射亭宿黃氏新館

姑山鑠靈壇千阜如堆玉山回路轉間射亭見新築主人雅好事借我南窓宿一夢到無何夢覺黃梁熟

別鄭大用于潯陽

子真千載士流風凜然存襟期輩古人喜見雲初孫客裏青燈連夜語痛飲忘形到爾汝掀髯一笑倚胡床浩歌赤壁凌雲句楓葉荻花秋送客令人愁挽君君不留

今日具扁舟我欠蓋頭茅一把何時去結雞豚社澤畔
行嗟醉復醒共看屬玉雙飛下

辛丑殘臘前一日扁舟東歸阻風馬當乞靈祠
下

維舟桑落洲十日風和雨雨餘江波平山橫眉黛嫵急
呼黃帽郎來扣靈真宇椒桂薦芳馨魚龍忽掀舞巨浪
拍天浮萬疊震鼉鼓淮洲十里間蜚檝不可渡三老前
跪陳珍貝非神子願言點歸裝勿為神所怒我生窶且

貧窮途一羈旅照乘乏明珠落霞有佳句稽首謝龍君
放我扁舟去

壬寅夏五月將治嚴陵之裝欲用李長吉故事
買奚奴負詩囊以歸呈谷隱趙使君

少年學書劍矯首睨八荒閭闔記昔遊霞佩高頡頏一
跌下青雲意氣久不揚乞取平頭奴提攜古錦囊歸釣
富春瀨濯纓纓歌滄浪

壬寅仲冬晦日同吳監丞游延祥宮延祥蓋和

靜所居也

霜日炫晴晝湖光掠眼明散策事幽討出門聊意行柳
塘和靜居宮殿若化成霞裾赤城仙笑語相逢迎雲腴
飲甘液琅函披內經趺坐縱名談妙處俱忘形須臾啟
靈鑠臺沼列萬楹逕路通深杳宮花不知名石泉鳴佩
環松篁奏竽笙彷彿如鈞天音韻鏗鏘經吾皇香案臣
筆力雕陽春危亭倚高寒意氣干青雲飲酣視八極神
馳白玉京日月看跳丸羲輪忽西傾歸來十里塘問訊

江梅英斷橋流水香一枝疎影橫煙淡月昏黃清於玉
壺水錦囊搜好句山阿紀前盟

填維揚

原註以下四
首投中隱

古人肉食無遠謀腰錢騎鶴向揚州春風十里珠簾捲
但看竹西歌吹樓天朝選用詩書帥上策公言須自治
屏翰堅持保障功江淮益壯金湯勢強敵不敢縱南牧
關塞煙迷芳草綠兒童歌舞樂昇平一曲梅花細柳營

都作院

天子除戎戒不虞修車脩器會東都羽林憶昨厭弓矢
剡木弦孤兒戲爾我公號令何精明武庫森嚴耀五兵
威震天驕奠京邑繇漢以來真鮮及

春大閱

波澄青海無傳箭我公獻納紆皇眷修嚴武備選車徒
天下雖安不忘戰車如流水馬如龍甲耀日兮旌蔽空
攬槍熒惑不敢動獨任朔方無限功天威震疊軍聲壯
會見龍庭焚老上燕然碣石與天齊為公重勒千丈碑

御書東坡雪詩石刻

殘更皎月垂半破西鄰促席寒威挫風流玉局老坡仙
雪夜清吟躡郊賀流落人間古錦囊帝恐天丁下取將
賡歌餘暇染宸翰奎壁昭回龍鳳翔我公稽首拜嘉惠
勒以堅珉貽萬世捲旗擬入蔡州城傳呼夜示吳元濟
謝人惠油炭

青藜照天祿寶炬分金蓮榮遇不可期膏火徒自煎
藥短無餘輝囊空無留錢一燈假鄰壁三冬廢塵編殘膏

許沾丐繼晷欣窮年

陰崖冷徹骨，搢拙殘無煙。
號寒冰氏子，炙背思負暄。
主君惠窮途，施予無所偏。
爐分天地春，力奪造化權。
和氣與俱游，死灰欣復然。

楚有稊菜色，潔而味辛。
夜對吳監丞，飲飲酣薦之。
以此恍然如在湖湘間。

山澤有臞儒，骨相無食肉。
平生藜覓腸，愧負詩書腹。
碧澗掇香芹，雕盤堆首宿。
艱苦謀一飽，未免窮途哭。
君今

食萬錢肥甘非不足味厭五侯鯖嘉蔬列瓊玉云自楚
中來芳辛有餘馥一笑下筯空鯨飲薦醺醑吟餘詩思
清如行湘水曲湘君不復見直欲跨黃鵠

甲辰季冬殘臘大雪主人以糟玉面狸及尊酒
為餉

南山白額虎暴戾日以滋納諸罟獲中食肉寢其皮文
狸外柔順玉面而豐肌與世了無忤奚亦遭危機得非
風味殊尊俎之所宜焚山獵獸者是以羅致之主翁厭

肥甘鼎食嗤羣兒殷勤築糟丘遣送持酒卮于時臘將殘雪花一尺圍玉樓寒起粟墨突晨未炊得酒且大嚼勿令兒輩知

唐劉雲有所思云玉井蒼苔古院深桐花落地無人掃因用其語集古句次韻

西征登隴首薄暮有所思所思鬱不見殘雲傍馬飛逢迎少壯非吾道百壺且試開懷抱黃帽青鞋歸去來桐花落地無人掃

謝石佛璉大禪

人生天地間百年如逆旅榮華風中烟富貴草頭露得
喪能幾何顚仰即今古師具正法眼與人一線路紛紛
輕薄兒誰解點頭句冥行方索途空滿戶外屨我提沒
底籃採藥空山去覲面偶相逢舉手便分付彈指了三
生無去亦無住

寄遠曲用唐人張籍韻

江南淡蕩煙波煖蒲萄渌漲春江滿日暮汀洲採白蘋

芹牙出水蘭心短美人去矣隔湘江誰其贈我明月璫
癸丑仲冬十日蚤晴從中使過萼湖未幾風雪

交作

黃岡之北萼湖東湖光萬頃磨青銅樓船東下飲飛集
牙檣十里旌旗紅魚龍震疊馮夷宮雲容倏忽變晴空
鬚髯振袂玉妃舞雪花撩亂穿疎篷

泊舟富池乞靈祠下

大江東南來馮夷此其宮羣山各獻狀奔走如游龍將

軍萬人傑智勇摧姦克草木知威名旂常紀豐功廟食
填茲土樓閣何穹窿我來拜靈祠紅日方瞳矚神鳥集
飛檣雪波捲晴空椒桂薦芳馨精誠冀感通謂言身半
百扁舟吾欲東羞作賈胡留願借一帆風

題郭季寬晚耕宿釣二圖

牛角橫素書春犁破朝雨鴻鵠志安知功名心自許
羊裘晦山澤貂蟬等鴻毛直釣道可行一釣聯六鼇
栖霞高士以詩鳴于時方幸締交而赴王隆之

請鶴馭西去挽之不留臨岐告別為賦二詩

大雅久不作正音寂無聞金門栖霞僊派續脩水漬學
海障鯨波筆力扛龍文我誦錦囊句十年思見君相逢
一盃酒和氣蒸春雲去我鼻端堊君其揮郢斤

蛟窟蕩羣妖霞帷快飛舉橫江餘鐵鎖中流屹砥柱主
人謫仙人道學侔千古紫皇香案前棹頭不肯住亭懸
孺子榻簾捲西山雨雞犬許同昇我欲騎鯨去

公無渡河

并引

古樂府有公無渡河篇從昔詩人賦詠俱與本
意不相侔余謂翁之勇於渡河者特以一壺之
力為可恃遂冒險而不之恤曾不知壺之力甚
微而河之險不可玩終遂致於淪厥軀茲亦可
為後世鑒矣因原其指為作數語用以自警云

河流決崑崙微禹其為魚龍門雖已鑿犀棹孰可踰老
翁披髮鬚如絲臨流欲渡將何之嫗止翁留翁勿渡翁
不嫗從捨之去中流憑一壺意謂千金俱一壺勢莫支

千金淪其軀壺兮壺兮翁之顰顰吼鯨吞方得意曲終
哀怨寫瑩篴鄰女為君雙墮淚

以浯溪磨崖頌為友人壽

明皇蠱孽妖顛倒由祿兒真人奮靈武羣公任安危笑
談收兩京鑾輅還京師廟社喜重安鐘簴曾不移詞臣
有元結歌頌鐫浯溪余生千載後每恨不同時半世看
墨本長哦山谷詩鳴劍馳伊吾有客噤未施十年客衛
府斗粟不療饑君今聯上閣婉畫贊籌帷眷簡隆三宮

復始可指期持以為君壽勲名書鼎彛明年奉漢觴重
修前殿儀摩挲古崖石更記中興碑

崧高詩為九江趙使君壽

崧高維嶽美良守趙公也公以周召間平之
才歛大惠于定江越九月政成民和課最南
國生申盛旦歌舞誦詠者溢于塗門下貢士
揚冠卿揆骖骸散蕪陋不足以形容公之盛也
採撫古詩語韻而歌之九頓首以薦公壽

崧高維嶽四方之極維嶽降神生此王國
綿綿瓜瓞莫莫葛藟周公之孫齊侯之子
柔惠且直小心翼翼王親命之南國是式
盡瘁以仕不懈于位四方于宣南國之紀
之綱之紀允文允武荆舒是懲四方無侮
早既太甚以祈甘雨零雨其濛介我稷黍
黍稷彧彧去其螟螣實維豐年我庾維億
萬億及秣物其旨矣此邦之人云胡不喜

周邦咸喜式歌且舞于時語語厥聲載路
其告維何自今以始俾熾而昌既多受祉
永錫難老眉壽保魯以佐天子為周室輔
我來自東小大稽首是用作歌以介眉壽

崧高維嶽十二章章四句



欽定四庫全書

集部

客亭類稿卷十三
四

詳校官庶吉士臣馬履泰

主事臣呂雲棟覆勘

謄錄監生臣尹大謙

謄錄監生臣陳長春

欽定四庫全書

客亭類稿卷十三

宋 楊冠卿 撰

古律編三

近體詩

庭草

庭草淒餘碧江風吹早寒帶圍愁裏減詩律病中寬
隱几閑留客迎門懶不冠蕭然有真處未易俗人看

別襄陽帥

淮海棠陰已著行却移小隊入襄陽江山尚帶戎馬氣
齋閣遽聞編簡香自昔聲名滿梁楚向來為政壓龔黃
風流高出山翁上不用擎鞭問葛疆

宿前崗鋪

老去心猶壯天邊歲欲除喜行新過路如讀未看書溪
水縈回淨人家遠近居梅花正愁絕薄暮雨疎疎

暮雨

飄飄為客久在在與春期暮雨林寒意花香悶舊枝看

成南國老慚誦北山移已悞世緣惡懷哉歸去遲

無題

鶯語丁寧隔曉窓露翻紅藥闌新粧玉笙莫作相思調
猶恐春歸得見郎

記夢

欹巖松檜轉龍蛟洞戶仙人字少霞烟烟長眉非是畫
翠翹斜倚碧桃花

問訊人間幾日期謂言何處是瑤池玉盃飲罷夢中醉

不記神遊話別時

壬午雜詩

黃屋非堯意謳歌有啟歸德參義昊古事與漢唐非喜
氣傳千嶂皇風浹九圍功成詎無日智勇舊沈機
寒甚王親駕春歸敵請和北軍方擁衆小戍或投戈形
勢中朝壯衰離僞境多燕雲可中裂豈限白溝河
不逆強鄰詐須當報使回君恩固寬大敵意每嫌猜義
舉初難廢兵端莫浪開要知情僞審往事驗方來

關內攻城戰淮東却敵兵敗亡初妄作狼狽坐虛名賊
勢雖亡命君心實好生不知他日事誰築受降城
已分依人老猶期振袂還有愁供白髮無力買青山北
駕方傳蹕西師已度關孤臣憂國汨東首落餘潛

寄別友生馬千里

秋鴻社燕幾時休萬里無家天盡頭青筠綠蓑今已辦
江湖歸去老漁舟

瘴雨蠻烟道路賒囊書匣劍是生涯海山佳處能相憶

好寄新詩鴈字斜

齊安

寂寞東坡對竹樓
兩公陳跡是前脩
津亭倚柁還商子
雪後獨為江上遊

隻輪不返笑曹瞞
赤壁空臨江水寒
想得周郎饒鼓競
小喬相與對春山

病後暑退

寬作遲留計
難期歲月功
方驚鼠輩舞
未覺馬群空
度

暑蘇病骨涉秋悲候蟲長江二千里只欠一帆風

甲申歲作

渺渺冰雪盡欣欣花柳蘇江澄炫初日沙潤茁新萋久
客亦勞止我行猶載驅乾坤如許大何處著吾廬

急雨來排難餘蒸頓解嚴時蛭鳴露柳客燕度風簾屈
指秋無幾安心氣自恬夜涼都不寐落月瑩虛簷

讀杜工部集

平生忠義不忘君末路升沈付九原千古神交真未泯

一時人事可重論
摩娑醉眼朝廷在
消息他鄉弟妹存
獨闕遺編堪墮淚
秋窓燈火雨昏昏

讀親征詔

詔語深醇告萬方
便知九鼎不勞扛
波臣奔走扶黃屋
約束風濤過大江

君王神武不怙兵
氣驚中原一掃平
可笑西江喜歸客
便裝行橐待還京

塞上雪中

雪色迷江國人誰入蔡城窻虛元自白梅破不勝清佳
客苦難喚清尊只細傾吾衰便靜退不忍浪談兵

代別張憲

澤國春強半餘寒燕子飛絕知懸榻久故作買舟歸歲
月空荒老行藏有是非功名遊戲爾此意尚依稀

老去安為客春來不着家江湖遂良覲身世入長嗟處
死寧無地謀生信有涯分攜感時節楊柳又藏鴉

回紋四時

輕風透幕羅衾薄
滿萼嬌紅綴小桃
明月對愁縈錦字
斷絃空暗紫檀槽

冰盤瑩靜風簾闔
酪粉嘗殘日影曛
稜枕印紅斜玉頰
碧山揎袖整輕雲

紋簾挹香餘汗粉
綠眉攢恨舊愁新
焚香夜拜初生月
暮色窻紗薄霧勻

霜驚葉落催寒曉
夢破人愁覺夜長
香暗折梅初點玉
鏡鸞呵手試新粧

九里松六言

風聲不斷天籟鐘韻初知日
暝人語驚飛幽鳥馬蹄踏
破輕雲

王幹竹枕甚簡古客有得之者為賦二絕

榮枯已熟槐安境
妄幻敢藏鴻寶書
一節黑甜參已透
漆園胡蝶浪分疎

夜明已賜號國姊
曲肱又屬東家丘
娛寢有人君得計
睡鄉留我取通侯

吳江道中

野色蒼煙濶蓬籠宿雨開湖光與天接林彩覺春回
心
事歸雙鬢年華付一盃松江元赴海流駛更須催
壞郭郊丘裏長橋煙浪間幽花經雨潤獨鳥受風還
春
水園叢薄晴雲吐亂山莫將吳越恨添入二毛斑

即事

歡悰憑淺酌衰相怯單衣詩向貧中好春從雨際歸
氣
寒憂麥瘦桑濕恐蠶饑豫學田園計他時恐願違

人事悲懽裏交情冷暖中山林催晚計顏面久秋風有
傳記者舊無書問子公反關違世久幽事亦忽忽
未辦因人出時歌不我過墨泓雲脚亂藥鼎雨聲多三
箋閱浮世把茆營懶窠肯將猶在否容易說干戈

讀書

憂世終何補忠懷悵不平收回長太息翻作短歌行是
事且復置今人誰可盟湘中千樹橘墨墨了餘生

題凌波采蓮圖

綽約風姿雲霧衣
波心新月映明輝
更深折得清香去
煙靄不知何處歸

歸塗春晚

待得春歸人亦歸
風花撩亂撲征衣
清香十里荼蘼路
零落珠幢對晚暉

點點更籌清夜徂
昏昏鄉月瑣窓虛
夢回忽聽狂風雨
明日前村花更疎

暫解征驂野水湄
卷衣上馬夜何其
客愁政自不堪說

殘月一聲聞子規

山茶

綠葉巖巖襯渥丹
疎林殘雪尚班班
先驅特為東君至
怕向春風桃李間

道間所見

窄窄山腰路
娟娟屋角花
谿回蔽脩竹
鷗暖戲春沙

夾江

雨洗山容淨
江流塞水通
征塗萬烟樹
行色一秋蓬
黯

澹平郊霧清徐遂谷風直須歌緩緩莫作去忽忽
麥浪浮濃綠山眉暈遠青光風來婉婉客意獨伶俜回
鴈鳴何許輕鷗下遠汀人家總幽隱煙雨竹門扃

漫題

著雨林花暗敲風檻竹幽翠屏疎得夢紅葉忽驚秋

適安旅次

山郭蕭條晚秋堂窈窕深輕寒籠暮靄橫吹度疎砧叢
竹深藏翠孤雲帶晚陰淹留有幽趣不礙短長吟

檻蒲行碧瘦林葉得紅深客子倦長夜居人催暮砧風
梢窻紙急月轉藥欄陰高枕已無睡寒螢休苦吟

曉思

山鳥春猶噓城烏曉亂啼危譙初罷角落月已催鷄地
迥來何事家遙夢到迷片懷如許惡深覺負爪哇

雪後

野日茅茨短荒村霰雪餘溪流山足裂谷迥鳥聲虛矯
首懷新隱歸窻有舊書殘年甘飽飯何必事名譽

觀諸園接花巢

花木聊觀化芳菲觸處同大都知歲晚各自占春風巧
着移根力陰爭造物功化鈞均播植此理杳冥中

寒食雨中

無家可耐異鄉何恠底愁邊萬感多今夜雨昏山月暗
泪痕元不減金波

晚風一再花狼籍春去忽忽不可尋蜂蝶亦如人意薄
便無消息到牆陰

渡口

欲繫孤舟日已斜
秋霜一岸著蒹葭
若為喚得愁魂醒
拄杖穿沙尋酒家

絕句

東閣官梅已退粧
遠村沙柳發新黃
遙知歸去西江路
定有飛花觸地香

忽憶前時小院歸
杏花牆角兩三枝
夜香燒斷黃昏月
縹緲憐家玉笛吹

始覺

始覺躬耕晚從誰話此情但能安食息敢復計聲名留
滯煩書信驅馳愧友生有懷愁不盡歸鳥暮雲橫

自檣李至毘陵道中

風捲雲歸雨忽晴月輪安穩上青冥恠來枕底流泉急
去去短桅初不停

朱槿碧蘆相間栽蓬棚車水過塍來茸茸秋色濃如染
已有陂塘似鏡開

極目雲天意已舒
迎人草樹綠扶疎
望中孤塔松江近
便有小舡來賣魚

滿目江山無限情
夫差城郭暮雲平
當時不競黃池長
一再何由致越兵

晉陵城東宰堵坡
兩尖高並下臨河
昔年曾醉鄰牆酒
卧聽扁舟唱踏歌

癸卯春雜用古語
繼吳監簿水月卽事

霜日炫晴晝意行
春色隨平林花淡淡
荒墅草離離竹

徑通幽處山雲薄暮時壺觴情未極飛鞚返青絲

為谷隱和虞參議韻

誅茅祇合老僧龕一笑欣陪麈尾談天末冥鴻方避弋
遼東白豕忍懷慚折腰我已宦情薄嚼蠟誰言世味甘
萬事轉頭俱夢幻試將此語靜中參

谷隱之東芍藥酴醾涉夏尚有存者籜龍頭角
且森列于前次前韻呈九江趙使君

衣鉢相傳書一龕晴窓時許聽名談詩成與客探囊取

句好令人下筆慚別墅經春花未老芳畦過雨蓀尤甘
明朝更欲從公去玉版堂頭作小參

歸自淮右讀楚辭有感

憶昔淮山戰骨高行人持節過臨洮匣中劒氣徒干斗
袖裏綸鉤莫釣鼇世事從來兩蝸角男兒不遇一鴻毛
功名槐國吾深省痛飲何妨讀楚騷

頃歲如番禺與慶傳十六兄遇上饒後五年胥
會于雲時太學增置生試竟不遂志將別去理

朱方棹因詠昔人風雨對床之語慨然有感作
是詩

囊空未辦買山錢壯志隨人祇自憐
千里鄉關愁夢裏幾年踪跡瘴江邊
回溪重困南搏翼異縣還尋東去船
何日蒼崖結茅屋與君風雨對床眠

繼詩社諸友韻

休將龜筮問窮通往事邯鄲午枕中
南郭吹竽羞濫食北山運畚笑愚公
酒邊賴有賡酬在客裏還欣臭味同

得句不妨頻寄我從今莫效馬牛風

復用前韻且約攜琴尋花下之盟

吟牋寫就訊難通人在千巖紫翠中
談笑尊壘有餘樂交遊氣概壓羣公
忘年許締金蘭好佳處何妨杖屨同
我欲攜琴坐花底乞君妙曲奏松風

淮楚春晚病中

絕塞驅馳有底忙病餘歸思遶江鄉
鴈飛不到楚天遠蝶夢何堪春晝長
滿地香紅初過雨一簾風絮正斜陽

愁邊賴有新詩在強劈吟牋付錦囊

遊交廣用帳幹趙德縱韻

家聲久矣愧長楊浪說男兒志四方鼎鼎百年半流落
悠悠萬里益淒涼羈懷嶺表芙蓉幕歸夢江南雲水鄉
欲訪匡廬近消息試憑征鴈到潯陽

琴久不作客問其故戲為說偈

昭琴不鼓任虧成澤畔行吟且獨醒自信榮枯本同轍
誰云得喪有殊形古今幾見桑田變日月常循晝夜經

去去來來祇如此風前別調不須聽

代秦幹上刑部張尚書

津

疇昔持衡氷鑑清議刑今去刻為明坐令几閣文書靜
馴致齋居獄訟平疏闊漢朝新禁網風流廷尉舊家聲
哀窮悼屈心如砥應笑張湯有重輕

平生報國劒鉉寒萬里漂流困一簞貧劇方思毛義檄
歸來却戴楚囚冠解驂舊事無人繼慟哭窮途祇自嘆
倚伏循環知有待春回寒谷在毫端

繼朱叔謙所寄韻

湖海三十載窮觀未見書文章耻沿襲體製薄浮虛老
去情懷惡生平習氣除交親應笑我術業廢三餘

王鷗盟別去久之有詩繼韻

急漿衝煙去奚奴喚不應清唸繼囊錦妙句琢壺冰天
遠暮雲碧江寒秋練澄懷人心欲折愁坐對青燈

秋日懷松竹舊友

松竹隱君子別來安穩不音書遲寄鴈風雨又驚秋金

井葉黃落青燈人白頭客懷難着語誰共賦牢愁
烏兔不停軌蒹葭鬢已蒼囊空攜古錦賦未奏長楊林
下松風曲爐邊栢子香朝昏作禪供榮辱已俱忘

倦遊

歸去陶彭澤重來丁令威逢場真戲劇閱世識危機
雨沾烏帽京塵黯素衣回頭今自笑三十六年非

水亭晚坐

煙波渺渺白鷗雙遠樹微紅襯夕陽坐久江風起蘋末

馮夷借我一襟涼

詩僧常不輕以梅花句得名于時雪後踏月相
過論詩終夕退得二絕以謝

十年袖裏梅花句夢遶江南煙雨村今日相看更愁絕
天低雲淡月黃昏

荒江落日孤鴻影遠趁幽人踏月來雪屋雲林淡相對
月邊依約有寒梅

題張安國舍人平沙落鴈圖

渚雲低壓雲山暮煙素橫空落日斜秋老江鄉稻梁熟
一行征鴈下平沙

九江春半雨中寒甚忽見梨花

江城一雨春強半寒色著人芳信遲賴有梨花遮病眼
一枝帶雨出疎籬

乙未秋賦不遂志歸寓水村

歸來不負白鷗盟要聽雲山韶濩聲鐘鼎軒裳非我事
從教水到自成渠

自仙潭泊歸舟呈王鷗盟

江頭重整舊漁衣
觸起眠沙鷗鷺機
煙渚蘆花留不住
葉舟還趁夕陽歸

絕嶂雲烟乍有無
蒼崖茅屋近何如
西風拍手喚征鴈
恐有平安錦字書

扁舟夜泊蓼花叢
曉挂風帆荅水東
擬辦蓋頭茅一把
十年湖海浪飄蓬

江村煙雨暗霏微
正是鷗盟得句時
雨後屏山展新綠

更煩摹寫送新詩

次韻王鷗盟秋日郊居即事

老去柴桑畫掩關悠然得意在南山
忘言妙處無人解
目送孤鴻天際還

不貪薏苡與明珠曳屣狂歌信杖扶
誰道先生貧徹骨
先生清處若冰壺

松菊依然遶舊廬西風歸興動鱸魚
歸來有酒輒成醉
旋摘秋園雨後蔬

次李提舉桂花韻

綠帷深護黃金粟，嫵媚似嫌紅粉粧。
年來不作廣寒夢，喜對孤標時踞床。

人間初未識奇木，子落蟾宮秋政芳。
託根底事在幽谷，要伴清都山水郎。

春雨未霽有載歌姬遊道場山者

濛濛煙雨暗空山，驕馬行春翠袖寒。
待得春風捲雲幕，却愁春色又闌珊。

塞上與鄭將夜飲

白髮將軍夜枕戈樓蘭未斬奈愁何挑燈看劍淚如洗
那聽蕭蕭易水歌

幾年京洛暗飛塵老上龍庭恨未焚安得君王倚天劍
提攜直上決浮雲

次韻李提舉秋日雜詠

羊坂路歧險燕巢生計踈萍蓬三尺劍衣鉢一床書葉
露泣金井欄牙挂玉鉤
冤清了無寐詩思不禁秋

次歸耕堂稀字韻

精忠貫日古來稀
帷幄從容扈六飛
風虎雲龍方際會
故鄉未許我公歸

神京千里鴈書稀
關塞傳聞驛騎飛
報道天驕遁沙漠
袞衣行從翠華歸

功業汾陽千載稀
龍庭單騎去如飛
笑談整頓乾坤了
黃鉞金鉦奏凱歸

湖山春老杏花稀
柳絮漫空作雪飛
橫槊賦詩有餘暇

不妨倒載送春歸

又用韻

弱水蓬山到者稀
凌空須仗羽輪飛
羣仙拍手山頭笑
笑我漂零胡不歸

窮巷無人車轍稀
尋巢燕子故飛飛
似嫌茅屋太低小
廣厦千間欣有歸

杏壇鏗爾瑟聲稀
劍佩三千羽蓋飛
獨對春風吟咏處
從今願學舞雩歸

乙巳春次中隱先生韻

密勿籌帷今幾春故山猿鶴尚關情中書歷徧令公考
樂道要從莘野耕

種滿人間桃李春門闌舊物詎忘情江湖若也有閑地
着我一犁春雨耕

挽葉南仲

疇昔丈人行典型詩禮家剛方排武叔詞賦敵張華造
膝陳經濟凝旒屢嘆嘉他年想遺烈拊髀諒興嗟

次韻王宣幹秋懷

囊錐脫穎久崢嶸
劍氣干霄恨莫平
江左方思見王導
兒曹誰敢吏淵明
悲秋欲賦情難極
憂國忘言酒細傾
高卧東山歲將晚
何如一起為蒼生

送堵脩遠歸湖城

十載讀書松竹林
壺觴歌詠有知音
君今別我市朝去
誰伴寒窓擁鼻吟

雲卧江村煙樹林
懸知出岫本無心
亭臯若也有歸鴈

得句不妨頻寄音

西樓

平頭四十誤儒冠
獨立西樓憂萬端
兩鬢飄蕭半華髮
羞將勲業鏡頻看

次韻葉無咎梔子花

樓石山前蒼筍花
品題從昔屬詩家
君看五字齊梁句
句好當今屈宋衙

從郭中隱覓酒併呈張君量

百斛龍文鼎可扛揮毫曾寄碧油幢酒兵若有三千騎
肯向詩壇築受降

又示同志

寂寂寥寥揚子居雲山相對一床書無人載酒問奇字
自把殘編時卷舒

歸途用李泉野韻

乾坤萬古幾昏曉兔走鳥飛不暫停去日荻花秋索索
歸時芳草又青青

癸丑生朝舟行有感

懸弧初度日，鞠育念劬勞。
未了詩書債，見輕兒女曹。
爭知兩蝸角，等是一鴻毛。
所貴盡忠孝，結交英與豪。

題畫扇

斷橋流水小舟橫，
卧看林梢素月明。
雙鶴不知何事舞，
風前時送九皋聲。

與金陵傅漕余預鄉薦時傅兄持文衡

著作承明近玉堂，
云何持節尚為郎。
運儲巧思蜀諸葛，

攬轡澄清漢范滂自昔謀猷資啟沃于今軍國欠平章
商巖事業公須繼好趁春風朝未央

鄉書憶昔獻賢能姓字曾叨天府登闕里摠衣欣附鳳
雲程歛翼愧飛鵬流年自信一彈指末路誰憐三折肱
若見金昆問消息為言霜鬢已鬍髥

繼韓尚書春日舟行韻

河水拍堤清且漣堤聯南陌與東阡浮家泛宅咎溪路
老却春光又一年

蜀魄思歸晝夜啼
漆園蝴蝶夢魂飛
簞瓢陋巷心如
惟
有
顏
淵
殆
庶
幾

與鄂州都統張提刑

五雲樓閣武昌宮
曾挫曹瞞百萬雄
今古興亡付流水
江山彈壓賴元戎
折衝尊俎笑談裏
極目關河指顧中
準擬明年會京洛
為君沽酒醉春風

貔虎雲屯細柳營
旌旗號令轉精明
人言卻毅詩書帥
自有孫卿仁義兵
關塞金湯今莫枕
江淮草木舊知名

家聲凜凜漢人傑看取籌帷功業成

江湖疇昔受恩深歲晚漂流傷客心
雨檣風帆倦行役雪車冰柱少知音
價高肯羨連城璧才謏難希謏墓金
但得扁舟從此去成虧寧復問昭琴

和京尚書上元日同禁從遊鳳山韻

苔封石磴遶層欄欄外行厨薦玉盤
座揖湖山詩興遠氣吞雲海酒盃寬
籃輿竟日有餘樂蓮市只今無此歡
我愧么微難接武飛牋亦欲寄青翰

洪溪口

短短桃華宿雨餘
風輕春水縠紋鋪
舵師苦要貪行色
不肯繫舡尋酒酤

臘梅四絕

遊蜂辛苦事芳菲
嚼蕊偷香釀蜜脾
還被東風巧收拾
又隨春色上南枝

枝上編鐘萬顆垂
凌寒傲視雪霜姿
從今疎影暗香句
不數西湖處士詩

塗黃不學漢宮粧一點檀心萬斛香嚼蠟我今忘世味
羞將花譜細平章

阿嬌厭貯黃金屋洗盡鉛華兒女粧香魂寒夜伴幽獨
青燈相對吟胡床

同韓吳二寺丞飲西湖梅花下酒酣繼韓韻

冉冉山雲薄暮時壺觴歌詠欲忘歸一盃且為梅花醉
莫待梅花作雪飛

港口

野寺雲山迥人家煙火稀水腥漁市近帆落晚風微拂
樹昏鴉去迎船白鳥飛吾生樂江海猶恐與心違

欽定四庫全書

客亭類稿卷十四

宋 楊冠卿 撰

樂府編

如夢令

滿院落花春寂風絮一簾斜日翠袖晚寒輕獨倚鞦韆
無力無力無力蹙破遠山愁碧

生查子

原註聞鶯
用竹坡韻

嬌鶯恰恰啼過水翻回去欲共訴芳心故遶池邊樹

人去綺窗閑絃斷簫笳柱百轉聽新聲總是傷情處

前調

原註忠甫持梅水仙研牋索詞

消瘦不勝寒獨立江南路羅襪暗生塵不見凌波步

蘭珮解鳴璫往事憑誰訴一紙綵雲牋好寄青鸞去

賦湘妃鼓瑟牋湘妃泛蓮葉上有片雲擎月

瀟湘日暮時倚櫂蘼葭浦不見獨醒人愁對湘妃語

璧月送歸雲一葉蓮舟舉寶瑟奏清商波底魚龍舞

浣溪紗

洞口春深長薜蘿幽棲地僻少經過一溪新綠漲晴波
驚夢覺來啼鳥近惜春歸去落花多東風獨倚賴愁

何

前調

原註次
韓戶侍

銀葉香銷暑簟清枕鴛醉倚玉釵橫起來紅日半窻明
多病情懷無可耐惜花天氣惱餘醒瑤琴誰弄曉鶯
聲

霜天曉角

原註次韻李次
山提舉漁社詞

漁舟簇簇西塞山前宿流水落紅香遠春江漲蒲萄綠
蘄竹奏新曲驚回幽夢獨却把魚竿遠去騎鯨背釣

璜玉

卜算子

原註秋晚集
杜句弔賈傳

蒼生喘未蘇賈筆論孤憤文采風流今尚存毫髮無遺
恨 淒惻近長沙地僻秋將盡長使英雄淚滿襟天意高
難問

垂絲釣

翠簾畫捲庭花日影初轉酒力未銷眉黛斂還停歌扇
背畫欄倚遍情無限悵韶華又晚錦韉去後愁寬珠
袖金釧碧雲信遠難託西樓鴈空寫銀笺怨腸欲斷更
落紅萬點

菩薩蠻

原注春日呈
安國舍人

飛雲障碧江天暮杏花簾幕黃昏雨翠袖怯春寒有人
愁倚欄天涯芳草路目送征鴻去人遠玉關長尺書
誰寄將

前調

原註春日西湖
用吳監簿韻

春山愁對修眉綠
春衫誰為裁冰縠
日暮倚欄干不禁
烟霧寒
湖邊歸去路
猶記傳觴處
往事等空花
客心驚歲華

前調

冰肌玉襯香綃薄
無言獨倚欄干角
相見又還休
可堪歸去愁
碧波溪上路
幾陣黃昏雨
歸去斷人腸
紗厨枕簟涼

前調

原註雪中
呈李常川

玉妃夜讌瑤池冷
翩然飛下霓旌影
天濶水雲長
風飄舞袖香
姑山人似舊
清壁紅梅瘦
同凭玉欄干
光陰銀海寒

好事近

原註代人書扇

晚起倦梳粧
斜簪翠髮雲鬢手
撚花枝輒笑問青鸞
音信
綉簾慵捲
玉鈎垂風簾奏餘韻
燈火黃昏院落報
雕鞍人近

前調

細雨落簷花
簾捲金泥紅
濕樓外遠山橫
翠染修眉愁
碧
舊遊春夢了
無痕香塵暗
瑤瑟憑仗青鸞飛去問
新來消息

謁金門

原註春
暮有感

傷漂泊負了花前期
約寒食清明都過却
愁懷無處着
晴日柳陰池閣風絮斜穿簾幕
簾外鞦韆閑綵索腸
斷人寂寞

憶秦娥

原註雪中擁琴對梅花寓言

東風惡雪花亂舞穿簾幙穿簾幙寒侵綠綺音斷絃索
宮梅已破香紅萼梅粧想稱伊梳掠十分全似舊時
京洛

前調

雲垂幙江天雪似楊花落楊花落翠衾不煖曉寒偏覺
起來獨倚西樓角客懷無耐傷離索蠻箋欲寄塞鴻
難託

清平樂

翠團嘉樹杜宇呼春去
簾捲金泥凝望處
幾點紅薇香雨
等閑過了
花時殷勤來問
酴醾恰有一枝春
在畫樓紅日林西

柳梢青

原註詠芍藥

紅藥翻堦天香國艷
輝映樓臺解語渾如三千粉黛
二金釵青鞋踏破蒼苔
趁舞蝶遊蜂去來宿粉偷香
也應難似年少情懷

前調

原註詠鴛鴦菊菊白而雙心秋晚始開

金藥飄殘江城秋晚月冷霜寒一種幽芳雕冰鏤玉舞鳳
翔鸞悠然靜對南山笑瓊沼鴛鴦飛翠瀾小玉驚呼太
真嬌困俯檻慵看

前調

原註為丁明仲紀夢

歸夢迢迢分明曾見舞遍雲韶解道相思愁寬金釧瘦
損宮腰覺來情緒無聊正戍角聲翻麗譙楚塞山長
巫陽人遠斗帳香消

西江月

原註秋晚白菊叢開有微視冰霜之興李漁社賦長短句云若將花卉論行藏

合在凌烟閣

上因次其韻

妙墨龍蛇蜚動新詞雪月交光論文齒頰帶冰霜鳳閣
從來官樣壽菊叢開三徑清姿高壓羣芳折花聊爾
問行藏會見橫飛直上

前調

羅襪浪傳仙子宮梅休寫華光人言壽客飽經霜不趁
凡花入樣萬玉森羅素節一枝賸有餘芳孤高肯使

蝶蜂藏持立甘泉頂上

前調

原註詠黃菊

昨夢鈞天帝所曾陪奏賦明光玉除金藥映秋霜盡道
宮花別樣嬌額塗黃半就金蓮觀步齊芳舞鸞儀鳳
巧難藏羞殺繁紅陌上

東坡引

原註癸丑季秋廿六日夜夢至一亭子
勝曰朝雲見二少年公子云久誦公樂

章願得從容笑語因舉似離筵舊作稱
贊久之余謝以不能公子哂然不樂命
小史呼妹麗十數輩至圓一方臺而立
相與羣唱聲甚淒楚俄頃歌者取金花

青牋所書詞展於臺上熟視字畫乃余作也讀未竟一歌者從傍攫取詞置袖中舉酒相勞苦云釵分金半股之句朝夕誦之胡為念不及此耶公子云左驗如此奚事多遜抵掌一笑而寤恍然不曉所謂戲用其語綴東坡引歌之

淥波芳草路別離記南浦香雲剪贈青絲縷釵分金半股釵分金半股陽關一曲聲淒楚惹起離筵愁緒夢魂擬逐征鴻去行雲無定攬行雲無定攬

鷓鴣天

原註次韻寶溪探梅未放

歲月如馳鳥兔飛情懷着酒强支持經年不見宮粧面

醺碧誰斟翡翠卮 江路晚夕陽低
奚奴空負錦囊歸
欲憑驛使傳芳信
未放東風第一枝

小重山

一笑回眸百媚生
嬌羞佯不語
艷波橫
緩移蓮步
繞堦行
凝情久
幽怨託銀箏
此事那回曾
水晶雙枕冷
簾紋平
窺人燕子苦
無情驚夢斷
何處覓雲行

蝶戀花

原註次張
俊韻

舞處曾看花滿面
獨倚東風
往事思量遍
綠怨紅愁
春

不管天涯芳草人腸斷 一紙雲牋魚鴈遠歸鳳求凰
誰識琴心怨臂枕香消眉黛斂也應為我寬金釧

前調

月冷花寒宮漏促人在虛簷玉體溫無粟絃斷鸞膠還
再續嬌雲時霎情難足 解道雙鴛愁獨宿宿宿翠偎紅
蛺蝶元相逐蓬海路遙天六六終須伴我騎黃鵠

水調歌頭

原註春
日行舟

春漲一篙綠江濶暮濤寒龍驤萬斛蜚舉鯨飲酒五寬

醉倚柁樓清嘯目送孤鴻杳靄景意與俱閑恍若馭風
去蓬島舊家山記吾廬環翠竹拱蒼官碧雲信杳誰
為日日報平安桂櫂桃溪歸後流水落紅香寂春事想
闌珊賴有錦囊句寫向此中看

前調

原註贈維
揚夏中五

形勝訪淮楚騎鶴到揚州春風十里簾幙香靄小紅樓
樓外長江今古誰是濟川舟檣烟浪拍天浮喜見紫芝
宇儒雅更風流氣吞虹才倚馬爛銀鈎功名年少餘

事鵬鶚幾橫秋行演絲綸天上環侍玉皇香案仙袂揖
浮丘落筆驚風雨潤色煥皇猷

前調

原註次吳斗
南登雲海亭

年少青雲客懷抱百憂寬北窓醉卧春曉歸夢趁吳帆
來訪鵲夷仙跡極目平湖烟浪萬象一毫端雲海渺空
濶咫尺是蓬山佩蜚霞囊古錦幾憑欄赤城應有居
士鳳舉更龍蟠待向玉霄東望相與神遊八極身未似
雲閑長劍倚天外功業鏡頻看

前調

原註歸自羅浮舟過于湖哭張安國至米石弔李謫仙悼今昔二賢豪之不復見也

月夜酌酒江濱慨然而去作長短句

曳杖羅浮去遼鶴正南翔青鸞為報消息巖壑久相望
無奈漁溪欸乃喚起蘋洲昨夢風雨趁歸航萬里家何
許天濶水雲長歷五湖轉相楚下三江興亡千古遺
恨收拾付詩囊重到燃犀磯渚不見騎鯨仙子客意轉
淒涼舉酒酹江月襟袖淚淋浪

水龍吟

原註金陵作

渡江天馬龍飛翠華小駐興王地石城鐘阜雄依天塹
鼎安神器鵲樓高建章宮濶玉繩低墜望鬱蔥佳氣
非烟非霧方呈瑞璇霄際 貌虎雲屯羽衛壯金湯更隆
國勢天驕膽落狼烽書熄玉門宴閉祇謁陵園長安不
遠中興可異笑六朝舊事空隨流水千古恨無人記

賀新郎

原註秋日乘風過垂虹時與一羽士俱
因泛言弱水蓬萊之勝傍有溪童具能
歌張仲宗目盡青天等句音韻洪暢聽
之慨然戲用仲宗韻呈張君量府判

薄暮垂虹去正江天殘霞冠日亂鴻遵渚萬頃雲濤風

浩蕩笑整羽輪蜚渡問弱水神仙何處翳鳳騎麟思往
事記朝元金殿聞鐘鼓環珮響翠鸞舞夢中失却江
南路待西風長城飲馬朔庭征虜目盡青天何時到羸
得兒童好語悵未復長陵杯土西子五湖歸去後泛仙
舟尚許尋盟否風袂逐片帆舞



--	--	--	--	--	--	--	--